

Nunat Avannarliit Killiit Siunnersuisoqatigiiffiannut aallartitat siulittaasuata Inatsisartut Suleriaasianni § 33, imm. 3, nr. 1 malillugu aalajangiiffigisassatut siunnersuut tulliuuttoq saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 3/2022-imi Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Islandimi, Kalaallit Nunaanni Savalimmiunilu naalakkersuisunut kaammattuutigaa pinngortitamik tunngavilimmik takornariartitsisarnermut nunani avannarlerni killerni nunat periusissiat aaqqissuussinerillu qulaajarneqarlutillu sanilliuunneqarnannik ingerlataqaqqullugit, tassunga ilanngullugit nunani pineqartuni takornariartitsisarnerup annertusiarturneranut atatillugu pinngortitamik atuisinnaaneq illersuinerlu, suliassaqaqfimmi suleriaatsit pitsaanerpaat suussusersineqarnissaat paasiniallugu.

(Aallartitat siulittaasuut Kim Kielsen)

Tunngavilersuut:

Islandimi, Savalimmiuni Kalaallit Nunaannilu takornariaqarneq takornariartitsisarnermillu inuussutissarsiuteqarpoq ukiuni kingullerni annertuumik ineriartorfiusimapput. Nunagisavut pingasut ukiorpassuarni nunani avannarlerni killerni takornariaqarneq pillugu suleqatigiinnikuuppuput. Siullermik suleqatigiiffiit assigiinngitsut aqqutigalugit: Vestnorden Tourist Board (VNTB), SAMIK, Kalaallit Nunaata Islandillu akornanni suleqatigiinnerusoq, aamma FITUR, Islandip Savalimmiullu akornanni takornariaqarneq pillugu suleqatigiinnerusoq.

2006-imi suliniaqatigiiffiit pineqartut NATA-mi (North Atlantic Tourism Association) kattupput. Ukiorpasuannngortuni suliniaqatigiiffiit pineqartut ussassaarineq Vestnorden Travel Mart ingerlattarsimavaat, taamatullu aamma nunani pineqartuni oqartussat, suliniaqatigiiffiit takornariartitsisartullu akornanni suleqatigiinnissamut suliniutit ingerlatallu tapersersortarsimallugit. Islandimi, Kalaallit Nunaanni Savalimmiunilu tamani takornariartitsisarneq tikeraallu amerliartuinnarnerat inuiaqatigiinni suliassaqaqfinni amerlasoorpassuarni ajornartorsiutinik pilersitsisimavoq.

Taakkununga ilaavoq pinngortitamik atuisinnaaneq misigisaqarsinnaanissarlu, tamatumanilu naalakkersuinikkut oqartussanit apeqqutit tunngaviusut isummerfigineqartariaqalersimallutik. Assersuutigalugu:

- Takornariartitsisarneq pinngortitamut, avatangiisinut kulturikkullu pingaartitanut qanoq sunniuteqartarpa?
- Takornariartitsisarnerup annertusarneqarnerani pinngortitap illersuineq qanoq qularnaarneqarsinnaava?
- Takornariaqarneq eqqarsaatigalugu pinngortitamik atuisinnaaneq qanoq aqunneqassava?

– Takornariartitsisarneq qanoq nunalerinermut, aalisarnermut inuussutissarsiutinullu allanut taakkulu pisinnaatitaaffiit qanoq sunniuteqartarpa?

– Pinngortitamik atuisinnaanermut akiliuteqartitsisinnaanermut periarfissat nunani pineqartuni qanoq malittarisassaqaartinneqarpap?

– Takornariartitsisarnermik inuussutissarsiuteqarneq innuttaasunit nakkutigineqarnissaa isertitsissutaasinnaaneralu qanoq qularnaarneqarsinnaava?

– Takornariartitsisarnermik inuussutissarsiuteqarneq pinngortitamik atuisinnaanermut nutaanik inatsisiliornissamut malittarisassiornissamullu pissutissaqalersitsisimava

– nunani pineqartunut takornarnianut innuttaasunullu

– tamannalu akornartorsiutinik sunik malitseqarsimava?

Savalimmiuni takornariaqarneq pinngortitamillu atuisinnaaneq annertuumik aporaaffiusimavoq, tamannalu tunngavigalugu inatsisilik malittarisassanillu allanngortitsinissamimassigiinngitsunik siunnersuuteqartoqartarsimallu, inatsisartunili amerlanerussuteqarfiunngitsunik.

Nunavut pingasut angissutsikkut pinngortitarlu eqqarsaatigalugit assigiinngitsorujussuupput. Pinngortitamik illersuineq, pinngortitamik iluaquteqarniarneq, piginnittussaaneq pinngortitamillu atuisinnaaneq inatsisiliornarit, malittarisassat eqqullu aamma assigiinngitsorujussuupput, taamatullu aamma Island, Kalaallit Nunaat Savalimmiullu tamarmik immikkut nunani pineqartumi pinngortitamik najukkanillu ataasiakkaanik atuisinnaaneq eqqarsaatigalugu ajorsuutit eqqarsaatigalugit assigiinngitsunik misilittagaqarlutik.

Nunat avannarliit killiit ataatsimoorluta ussassaarutigisarpagut pinngortitarsuaq pinngortitamilu misigisassat qitiutillugit.

Taamaattumik pingaarutilerujussuusinnaavoq naalakkersuinikkut taamatullu aamma misilittakkat, inatsisit malittarisassallu eqqarsaatigalugit ilinniarfigeqatigiissinnaanerput, taamatullu aamma nunatsinni pingasuni pinngortitamik tunngavilimmik takornariartitsisarneq eqqarsaatigalugu iloriusissianik suliniutinillu assigiinngitsunik sanilliussisinnaanissarput.

Taamaattumik siunnersuutigineqarpoq Islandimi, Savalimmiuni Kalaallit Nunaannilu naalakkersuisut suleqatigiissasut tamatumani apeqqutit tunngaviusut nunani pineqartuni pingasuni qanoq suliarineqarsimanerat aalajangiivigineqarsimanerilu pillugit qulaajaanermut sanilliussinermullu, taamatullu aamma pinngortitamik tunngavilimmik takornariartitsisarneq qanoq malittarisassaqaartinneqarnerisq suliasaqaqarfillu eqqarsaatigalugu nunat qanoq iloriusissiorsimanersut.